

Date – 17/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan Mizoram chu ramchhunga state ralmuang ber zinga mi a nih avangin venhimna lamah sum a dawng tam tawk lo tih a sawi.
2. Nizan zanlai pelh hnu khan Aizawl Treasury Square-a Venghlui Bazar a kang a, a bul building -a ZORO leh PAMRA office te a kang bawk a ni.
3. Prime Minister Narendra Modia chuan Pakistan nen remna siam tura hmalakna reng reng chuan dodalna a tawh thin thu leh Islamabada hruaituten ngaituahna tha zawk an neih a beisei thu a sawi.

<><><>

UNION HM

Mizoram Chief Minister Pu Lalduhoma chuan Mizoram chu ramchhunga state ralmuang ber zinga mi a nih avangin venhimna lamah sum a dawng tam tawk lo tih a sawi.

Nizan khan Union Home Minister Amit Shah hoin Guwahati ah North East state chief Minister te leh Manipur Governor Ajay Kumar Bhalla ten venhimna chungchang an thlirho a. Inhmukkhawmah hian criminal law thar pathum hman anih dan chungchang sawiho a ni a. State tin atangin hmalak dan entir a ni.

Inhmukkhawm zawha chanchinbumite kawmin Pu Laolduhoma chuan Criminal law hman thar chungchangah Mizoramin harsatna a tawh chu internet connection ah a nih thu sawiin Union Ministry of Communication and IT te chuan scheme thar siam se tuna harsatna hi chinfel thuai nise aduh thu a sawi a. Hei bakah hi Bangladesh, Myanmar leh Manipur atanga sahimna zawnga lo raltlan mi sing 4 leh sang 1 chuangte lo tuamhlawm an ngaih thu sawiin sum leh pai a tam tawk loh avangin sawrkar laipui atanga sum tam zawk dawn an beisei a ti a. International Border thui tak Mizoramin a neih avangin Police tha pawh tihchak a tul thu sawiin state dangin venhimna puala sum an dawn thin Security Related Fund Mizoram a ralmuan avangin he fund hi pek ve a ni lo a, hetihreal hian peace bonus dawng ve se a duh thu a sawi a ni.

<><><>

ASSEMBLY

Assembly inkhawm kal lai mekah vawiin hian minister pahnih Pu C. Lalsawivunga leh Pu Lalnghinglova Hmar te department enkawlina tur sum ruahman chu ngaihtuaha pawm tum a ni ang.

Ni 3 lai an chawlh hnu-ah vawiin chawhma dar 10 leh a chanve atangin Assembly inkhawm chu chhunzawm leh a ni dawn a. Darkar khat chhung zawhna leh chhanna hun hman a nih hnu-ah MLA te hlawh leh pension

chungchanga dan siam thatna tur duan lawk, The Mizoram Salaries, Allowances and Pension of Members of the Legislative Assembly (Amendment) Bill, 2025 chu parliamentary affairs minister Pu Vanlalhlana'n House-ah a pharh ang a. He dan siamthatna tura rawtna hi MLA te hlawh tihpun emaw tihtlem emaw lam ni lovin dan ding lai tlema her remna mai tur a nih thu dawn a ni. He mi hnu hian Pu C. Lalsawivunga enkawl department 4, local administration, art & culture, district council and minority affairs leh animal husbandry & veterinary te sum hman tur ruahman cheng vaibelchhe 977 nuai 44, sing 9 leh sang 7 bakah Pu Lalnghinglova Hmar enkawl department 3 - excise & narcotics, sports & youth services leh Labour, Employment, Skill Development & Entrepreneurship atana sum ruahman cheng vaibelchhe 113, nuai 95, sing 7 leh sang 5 te chu house pawmpui turin pharh a ni ang a. Sawiho hnu-ah vawiin vek hian pawm tum a ni ang.

Tuna assembly inkhawm (budget session) kal mek hi February ni 19 atanga tan a ni a, March ni 20 thleng awh tura duan lawk a ni a. March ni 4 a finance changtu chief minister Pu Lalduhoma'n assembly a tangka kum thar (2025-2026) atana Mizoram sum ruahman cheng vaibelchhe 15,198 leh nuai 76 chu March ni 20 khian pawm fel hman tur a ni a. Kumin tangka kum kal lai mek (2024-2025) chhunga sum dil belhna leh a behbawm dang, supplementary demand for grants cheng vaibelchhe 3,512 leh nuai 33 chu March ni 5 khan assembly hian a lo pawm tawh a ni.

<><><>

FIRE

Nizan zanlai pelh hnu khan Aizawl Treasury Square-a Venghlui Bazar a kang a, a bul building -a ZORO leh PAMRA office te a kang bawk a ni.

Kangmei chhuah hun chiah hi hriat a ni lova, Treasury Bazar Main road chhuah chhoh lam chin chanve vel chu a kang chhia a, chawhmeh zuar an tam ber a, thawmhnaw, chemte dawr leh sa dawr vel kang chhe zingah hian a tel a ni. Kangmei chhuakah hian chhungkaw 60 chuang eizawнна a kangral ni a sawi a ni.

Kangmei chhuah thu hriat anih velah Fire Dept te che chhuak nghalin, kangthelh hna an thawk nghal a, kangmei chhuak hi a nasat avangin, thelhmi h thuai a harsa deuh ni a sawi a ni bawk.

Treasury Bazar ah hian chhungkaw 100 velin ei an zawng ni a hriat a ni.

<><><>

MIDDLE SCHOOLS

Mizoram sorkar enkawl middle school 5 chu zirtirtu awm si a zirlai nei lo an ni a, sikul 21-ah zirlai ai-in zirtirtu an tam zawk.

MNF member Pu Ramthanmawia zawhna School Education Mminister Dr. Vanlalhlana'n ziaka a chhanna atanga a lan dan chuan zirtirtu awm si, zirlai awm lohna middle school hi 5 awmin middle school 21-ah zirlai ai-in zirtirtu an tam zawk a. Middle school 13-ah chuan zirlai leh zirtirtu awmzat a inzat bawk a ni. Lawngtlai district-ah zirtirtu awm si a zirlai awm lohna sikul a awm lo chungin zirlai awmzat ai a zirtirtu tam zawkna middle school 6 a awm a, sikul 5-ah zirtirtu leh zirlai an inzat chiah a ni. Mamit district-ah chuan middle school 6-ah zirlai aiin zirtirtu an tam zawk a, Luimawi middle school-ah

zirtirtu leh zirlai 8 ve ve an awm. Lunglei district-ah chuan Thehlepp upper primary school (SSA enkawl)-ah zirtirtu 2 awmin zirlai an nei lova. sikul 3-ah zirlai ai-in zirtirtu an tam zawk a, Chhumkhum upper primary school (SSA enkawl) bakah Dinthar comprehensive elementary school leh Hmuntlang middle school (SSA)-ah te zirlai leh zirtirtu awm an inzath chiah a ni.

Kolasib district chhungah Lenhmuikawn upper primary school (SSA)-ah zirlai awm lo chungin zirtirtu 3 an awm a, Zotlang upper primary school (SSA)-ah zirlai nei lovin zirtirtu 4 an awm bawka. South Chhimluangah zirlai pakhat chauh zirtirtu 7 in an enkawl a, Zodin-ah zirlai 1 chu zirtirtu 6 in an vil a, Sethawn-ah zirlai 4 chu zirtirtu 7-in an zirtir bawka. Kolasib district a hetiang dinhmuna awmte hi upper primary school (SSA enkawl) vek an ni a. Zirtirtu leh zirlai inzath awmna sikul a awm lo thung. Aizawl district-ah chuan Chhanchhuahna Khawpui upper primary school (SSA)-ah zirlai awm lovin zirtirtu 3 an awm a, Hermon middle school (SSA)-ah zirlai awm lovin zirtirtu 1 a awm a. Government Hlimen middle school-ah zirtirtu leh zirlai 7 ve ve awmin Tuikhurhlu-ah pawh zirlai leh zirtirtu 5 ve ve an awm a ni. Khawzawl district-ah chuan Khualen upper primary school (SSA)-ah zirlai leh zirtirtu 6 ve ve an awm.

Serchhip district-ah Buhkangkawn middle school (SSA)-ah zirlai 3 awmin zirtirtu 5 an awm a, govt. midland comprehensive school-ah zirlai 4 awmin zirtirtu 7-in an zirtir a ni. Saitual district-ah Dilkhan upper primary school (SSA) chuan zirlai leh zirtirtu panga ve ve a nei bawka.

<><><>

DISASTER RELIEF

Nikum May ni 27 leh ni 28 a Cyclone Remal avanga chhiatna nasa tak tuartute tan Mizoram sorkar chuan cheng vaibelchhe 46 leh nuai 40 a pe chhuak.

Tun hnai a Disaster management & rehabilitation minister Pu K. Sapdanga'n tunhnai a assembly house chhunga zawhna a chhan danin Cyclone Remal-in nikum May ni 27 leh ni 28 a Mizoram hmun hrang hranga chhiatna a thlen avang khan Finance Commission 15-na in State Disaster Response Fund (SDRF) a ruahmansak atang khan cheng vaibelchhe 46 leh nuai 40 zet chu a tul anga hman tura pek chhuah a ni a. He ta tanga cheng vaibelchhe 5 leh nuai 17 chu thlichhia tlehin in a tihchhiat neitute tanpuina atan district disaster management authority (DDMA) tinah sem a ni a, cheng vaibelchhe 1 leh nuai 80 chu leimin leh in chim thenfaina senso atan DDMA-te hnenah sem a ni bawka a. A la bang zawng chu department 9 hnenah pek chhuak a ni.

Department zingah hian PWD-in SDRF sum hi an dawng hnem ber a. Leiminin kawng a hnawh leh in chimte thawm thatna atan cheng vaibelchhe 13 an dawng a. Power & electricity department chuan kawlphehtha semchhuahna hrui leh ban chhiate leh khawl hrang hrang chhiate thawm that na'n cheng vaibelchhe 10 leh nuai 20 an dawng a. PHE chuan an tui pipe leh tui pump chhuahna khawl chhia leh thil dang dang atan cheng vaibelchhe 4 leh nuai 27 an dawng a. Sikul leh an department in chhiate thawmthatna atan school education department chuan SDRF sum hi cheng vaibelchhe 3 leh nuai 79 an

dawng a ni. SDRF sum dawngtu dangte chu irrigation & water resources, horticulture, agriculture, health & family welfare and fisheries department te an ni. Cyclone Remal avanga chhiatna thleng leh a kaihhnawihah mi 34-in nunna an chan a. Nunna chante hi Melthum, Hlimen, Salem veng te bakah Falkawn Lungsei, Kelsih leh Aibawk khaw mite an ni a. Kha thlichhe tleh khan mihring nunna a lak bakah in leh lo, huan leh sorkar leh mimal bungraw tam tak a tichhia a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CROP INSURANCE

Agriculture minister Pu PC Vanlalruata’n agriculture department-in crop insurance hi Fur thlai (Kharif season), 2025 atanga kalpui turin hma a la mek niin a sawi.

Assembly-a Congress member Pu C. Ngunlianchungza zawhna ziaka chhangin Pu PC Vanlalruata chuan fur thlai atana crop insurance kalpui dan tur zir Chiang tur hian study group on Crop Insurance din a nih thu a sawi a. State Level Coordination Committee on Crop Insurance (SLCCCI) pawh Agriculture department secretary kaihhruaina in thun hnai khan an thukhawm niin a sawi. Crop insurance hi Mizoramah kalpui a la nih rih loh thu minister chuan a sawi bawk.

<><><>

ZMC & HOSPITAL

Zoram Medical College leh hospital tihchangtlunna tura sorkar laipui-in special package pek tura a tiam chu Mizoram sorkarin a la dawng lo.

Tun hnai a health & family welfare minister Pi Lalrinpui-i'n MNF MLA Pu Lalrinsanga Ralte zawhna ziaka a chhanna-ah Mizoram Health Minister in Union Health & Family Welfare Minister in Special Package pek a tiam anga a lo sawi tawh hi tun dinhmun ah dawn a la nih loh thu a sawi a. Special package dawn a nih loh chhan hi Ministry a in thlak a, health & family welfare minister tharin a la pek theih rih loh vang niin Pi Lalrinpuii chuan a sawi a ni.

<><><>

PM

Prime Minister Narendra Modia chuan Pakistan nen remna siam tura hmalakna reng reng chuan dodalna a tawh thin thu leh Islamabad hruaituten ngaituahna tha zawk an neih a beisei thu a sawi.

Nizana US-a inkulh podcaster Lex Fridman nen an inkawmnaah Pu Modia chuan kum 2014 khan Pakistan PM Nawaz Sahrif chu abik taka zin tura a sawm thu sawiin ram pahnih inremna turin beiseina sang tak a neih thu a

sawi a . Pakistan chun hun rei tak ata tawh firfiakrte an pui ru tlat ith sawiin
khawvel pawhin hei hi a hre chaing tawh a ni a ti .

<><><>